

per Iesum Christum Dominum nostrum. Merito sperare possumus in Domino tota die, & nocte, quoniam apud ipsum misericordia est. Sunt quidem extra Deum opera misericordiae; vnde dictum est, Misericordia Domini plena est terra; & alibi Misericordia tua usque ad nubes: est etiam in piis hominibus participatio quaedam misericordiae; sed ipsa misericordia apud Deum tantummodo reperitur, inque solo eius sinu requiescit: misericordia enim miseras tollit: quis autem potest miseras tollere, nisi qui miser esse non potest? quis potest defectus omnes curare, nisi qui defectu omni caret, & omnipotens est? Deo soli proprie convenit, quod idem Propheta dicit, Tu Domine suavis, & mitis, & multae misericordiae omnibus inuocantibus te. Itaque rectissime sancta Mater Ecclesia in precibus Deum appellans dicere solet, Omnipotens & misericors Deus. Neque solum sperare debemus in Deum, quoniam apud eum misericordia est; sed etiam quoniam apud eundem copiosa redemptio est: nam misericordia Dei, quae generi humano misereri decreuerat, ut iustitiae quoque satisfaceret, inuenit ipsa pretium magnum, sanguinem videlicet Unigeniti, qui redimeret copiosissime omnes omnino captiuos; potuit enim homo seipse vendere sub peccato, & a diuina iustitia subiici Diabolo tanquam tortori, cui homo consenserat ad peccatum. Sed non potuit villo modo seipse redimere, neque de potestate Diaboli eruere. Ergo quod homo non potuit, misericordia diuina fecit, ut per sanguinem Unigeniti fieret. Sed haec redemptio apud Deum erat, cum Psalmus iste scriberetur. i. in consilio, & decreto Dei, nunc autem misericordia Domini plena est terra, quando quotidie pretium illud in redemptionem captiuorum expenditur. vnde ab Apostolo dicitur, Empti estis pretio magno, glorificate, & portate Deum in corpore vestro 1. Cor. 6. & clarius a B. Petro, Non corruptibilibus auro, vel argenteo redempti estis, sed pretioso sanguine quasi Agni immaculati, & incontaminati Christi, 1. Petri 1. Dicitur autem haec

redemptio copiosa, tum quia propitiatio est pro peccatis nostris, & non tantum nostris, sed etiam totius mundi. 1. Ioan. 2. tum quia non solum hoc pretio redimimur a captiuitate, sed etiam euehimur ad participationem hereditatis, & Regni, ut simus haeredes Dei, cohaeredes autem Christi, Rom. 8.

Et ipse redimet Israel ex omnibus iniquitatibus eius. VIII

Redemptio quae erat apud Deum, tum plane manifestabitur, cum redimetur Israel, id est, populus Dei, non ut Iudaei carnales expectant a potestate Regum temporaliu, sed ab omnibus iniquitatibus suis. Quod Angelus de Iesu Christo exposuit, cum ad sanctum Ioseph ait, Matth. 1. Vocabis nomen eius Iesum, ipse enim saluum faciet populum suum a peccatis eorum. Haec redemptio iam quidem inchoata est, sed perfectissime complebitur in die nouissimo, cum liberabimur non solum a peccatis, sed etiam a poenis omnibus peccatorum, & a periculo deinceps peccandi, quod significauit Dauid in Psal. 102. cum ait, Quatum distat ortus ab occidente, longè fecit a nobis iniquitates nostras. & initio Psalmi, Qui propitiatur omnibus iniquitatibus tuis, qui sanat omnes infirmitates tuas, qui redimit de interitu viam tuam, qui replet in bonis desiderium tuum, &c. & perspicue Dan. c. 9. Ut consummetur praeuaricatio, & finem accipiat peccatum, & deleatur iniquitas, & adducatur iustitia sempiterna.

PSALM. CXXX.

Titulus, & Argumentum.

Canticum graduum.

Cantat in hoc Psalmo Dauid humilitatis suae virtutem, & cantat non coram tribus, aut quatuor hominibus, sed in theatro orbis terra; & tamen cum hoc sit vehementer se laudare, non facit contra preceptum illud Proverb. 20. Laudet te alienus, & non os tuum, extraneum, & non labia tua.

CCCC 3

Siqui-